

LISTOVI...

GRAČANIČKI GLASNIK
časopis za kulturnu
historiju

Broj 45, godina XXIII
maj, 2018. [str. 169-185]

© Monos 2018

Listovi gračaničkog kalendara od 26. 10. 2017. do 11. 5. 2018.

**Priredili: prof. dr. Omer Hamzić i
mr. Edin Šaković**

26.10.2017.

**Završena rekonstrukcija 500 metara
regionalnog puta Gračanica – Srnice...**

...na dionici Gračanica-Bukva-Doborovci-Srnice obilježen je danas u Gornjim Srnicama, u općini Gradačac. To je samo dio planova Direkcije za puteve TK na osposobljavanju kompletne trase puta od Gračanice do Srnica, koja je, inače do sada bila prilično zapostavljena. Vrijednost obavljenih radova je oko 350 hiljada KM. Osim što ima značaj za općine Gračanicu i Gradačac, ova saobraćajnica znatno rasterećuje magistralne puteve i skraćuje put iz srednje Bosne prema Brčkom i Orašju. Na prigodnoj svečanosti čelni ljudi općina Gradačac i Gračanica i predstavnici Vlade TK obećali su nastavak radova na ovom putu i u 2018. (izvor: RTV Slon)

26. 10 2017.

**„Ja pčelama vjerujem puno više nego
ljudima...“**

...izjavio je za list „BH Pčelar“ Husein Okanović, bivši radnik – konfeksionar u gračaničkom „Olimpu“ iz Škahovice kod Gračanice, koji je napustio preduzeće i potpuno se posvetio pčelama. Bavi se pčelarstvom od 1952. godine, a za uspomenu čuva i danas trnku djeda Halila, koji je također bio poznati pčelar u ovom kraju.

U gračaničkom pčelarskom Udruženju su ponosni na “svog Husu” čije pčelarsko carstvo broji blizu stotinu društava. Putem lista „Bh pčelar“, poručio je i ovo: „Opuštanje uz zujanje pčela je nezamjenjiv i neprocjenjiv osjećaj. Zato svi oni mladi ljudi, koji koliko-toliko imaju

LISTOVI...



želju i volju da se bave pčelarstvom, neka nabave košnicu-dvije jer će im život uz pčele biti mnogo ljepši i sretniji...“ Osim meda vrhunskog kvaliteta, ovaj vrijedni čovjek proizvodi i druge pčelinje proizvode – polen, propolis i matičnu mliječ – koji su i najtraženiji proizvodi u njegovom komšiluku. Među gračaničkim pčelarima poznat je i po pojilicama za pčele koje je uradio po svojoj zamisli. Ovu svojevrsnu inovaciju napravio je zato što želi biti siguran da njegove pčele i mnoge druge koje “navrate” piju zdravu i kvalitetnu vodu. (Izvor: bhpčelar)

5. 11. 2017.

U organizaciji Umjetničko-obrazovnog centra Gračanica: Peti po redu „Narodni muzički festival“

0 Tokom tri dana festivala u prepunoj sali BKC u Gračanici posjetioci su imali priliku da čuju i vide više stotina izvođača, članova raznih folklornih i umjetničkih grupa i ansambala te kulturno-umjetničkih društava sa područja općine Gračanica i Doboj Istok. Prve večeri pod nazivom „Veče sevdaha i orijentalnog plesa“ svoje umijeće i koreografije pokazali su članovi Gradskog ansambla Gračanica, dječijeg obdaništa „Naša djeca“, plesnog studija „El nur“ iz Lukavice, plesnog kluba „Rock step“ te gračanički muzičar i umjetnik Jakub Džafić. Druge večeri pod nazivom „Veče folkloru i modernog plesa“ nastupila su: Folklorni ansambl UOC-a, Udruženje mladih „Sijedi krš“, UG „Jošak“ Piskavica, OKC „Bosna art“ Stjepan Polje, plesni klub „Rock step“, Elvira Aljić, Haris

Dželilović i Azijada Mulalić. Treći dan festivala bio je rezervisan za ljubitelje za ljubitelje dječijeg stvaralaštva koji su uz aplauze ispricali svaku tačku. Pored kulturno-umjetničkih društava učešće su uzeli i članovi udruženja *Futura* iz Gračanice te gosti iz Doboj Istoka. Generalni pokrovitelj ovog projekta je Općina Gračanica. Osnivač Narodnog muzičkog festivala Ekrem Ćurić je rekao da je ove godine publici ponuđen kvalitetniji izbor izvođača i zanimljivi sadržaji, s obzirom da je ovo peta godišnjica festivala (Izvor: BKC).

17. 11. 2017.

Kompanija „Širbegović“ u prvih 10 mjeseci 2017. udvostručila prihod u odnosu na isti period prethodne godine...

...i tako se učvrstila na liderskoj poziciji u regionu među građevinskim kompanijama koje se bave izgradnjom objekata od betonskih konstrukcija. Pored rasta prihoda od prodaje, Kompanija bilježi poboljšanje i u svim ostalim pokazateljima poslovanja. Tako su aktivnosti u cilju povećanja produktivnosti postojećih kapaciteta rezultirale povećanjem ukupne proizvodnje od preko 38 %, dok je proizvodnost po radniku povećana za 30 % u odnosu na isti period prošle godine. Investicije u transportna sredstva rezultirale su povećanjem transportovane konstrukcije za 41 % u odnosu na isti period prošle godine, dok je montaža ab konstrukcije povećana za preko 55 % “. Poslovni uspjesi temelje se isključivo na kvalitetnom i brzom izvođenju radova s maksimalnim poštovanjem ugovornih obaveza. U proteklom periodu ugovoreni su značajni projekti u Hrvatskoj, Srbiji, BiH i Crnoj Gori, čija je realizacija u toku. U tok su pregovori za još nekoliko značajnih projekata, posebno u Srbiji i Hrvatskoj, koji se već duže vremena najavljuju u javnosti. S tim u vezi, poslovni rezultati u toku ove godine kao i projekti koji su pred ugovaranjem, potvrđuju ispravnu poslovnu orijentaciju ka

širenju na međunarodno tržište,“ što nam“, kako poručuju iz ove Kompanije, „ulijeva veliki optimizam, ali i obavezu da opravdamo povjerenje koje nam naši kupci povjeravaju svih ovih godina.“ (Izvor: web portal Kompanije „Širbegović“)

20. 11. 2017.

U prostorijama Mjesne zajednice Soko svečano otvorena „Bosanska soba“...



...čime je označen i početak rada Udruženja žena „Gradina“ Soko. Svečanosti su, kao gosti prisustvovali članice sličnih udruženja sa područja općine Gračanica. U opremanju Bosanske sobe učestvovali su mještani mjesne zajednice koji su donirali razne starine i rukotvorine koje krase ovaj ambijent. Skup je pozdravio načelnik Općine Nusret Helić i predsjednik Mjesne zajednice Mirzet Topčagić, koji je rekao da će ovaj prostor i Udruženje pružiti priliku prije svega mladima da se klone loših navika. Udruženje će svakako obogatiti kulturni i društveni život ove mjesne zajednice. Inače, U sklopu Udruženja žena djeluje i kulturno-umjetničko društvo, hor ilahija kao i omladinsko udruženje. Njihovi planovi za narednu godinu su organizovanje edukacija, izleta, posjeta raznim sajmovima kao i organizovanje smotre folkloru u Sokolu.

18. 11. 2017.

Otvoren Tržni centar „Belamionix“ u Gračanici

Izgrađen je u poslovno-trgovačkoj zoni, u blizini raskrsnice na ulazu sa magistralnog puta Doboj – Tuzla u Gračanici, gdje se na-

lazi još nekoliko sličnih objekata. Svečanom otvaranju prisustvovali su brojni građani i gosti iz vlasti općine i Tuzlanskog kantona. Govorio je i direktor firme Belamionix Brčko distrikt Sejfudin Suljić, kao i poslovni partner ove kompanije Fuad Yuksel, direktor za izvoz firme „Elvan“ iz Turske, koji se zahvalio vlastima i poslovnim subjektima Gračanice, koji su podržali gradnju ovog objekta. Vrijednost ove investicije je oko 8 miliona KM i realizirana je vlastitim snagama kompanije Belamionix koja zapošljava oko 600 radnika. U novootvorenom objektu u Gračanici posao je dobilo 90 mladića i djevojaka.

24. 11. 2017.

Općina Gračanica je nizom aktivnosti i događaja obilježila 25. novembar, Dan državnosti Bosne i Hercegovine – izložba akademskog slikara Meše Bajrića

Pored protokolarnih i drugih prigodnih manifestacija (polaganje cvijeća na spomen-obilježja, svečana akademija, kulturnoumjetnički program), posebnu pažnju privukla je samostalna izložba slika i grafika akademskog slikara Meše Bajrića iz Gračanice, postavljena u zavičajno-muzejskoj zbirci i galeriji a nakon toga i Jazz koncert u foajeu BKC-a, u organizaciji KUD-a „Adem Alić“.

26. 11. 2017.

Uspješan nastup mladih muzičara iz Gračanice na Trećem međunarodnom festivalu „Akordeon fest“ u Grazu

Riječ je o dvodnevnom međunarodnom takmičenju solista na harmonici i kamernih sastava, učenika osnovnih i srednjih muzičkih škola, čiji su organizatori bili Udruženje umjetnika „Artist“ i Odjeljenje za kulturu „Stadt Graz Kultur“. Nastupile su ekipe iz Austrije, Hrvatske, Srbije i Bosne i Hercegovine. Gračanicu su predstavljali mladi muzičari iz Osnovne škole „Hasan Kikić“:



Amira Avdić, Nadja Kovačević, Lejla Helić – nestandardni ansambl harmonika i klavir, druga kategorija i osvojile I nagradu (Laureat takmičenja). Drugu ekipu činile su učenice Lejla Hadžihasanović, Aida Halilčević i Esmā Grbić – nestandardni ansambl harmonika i klavir, te osvojile I nagradu. Kao solista na harmonici u prvoj kategoriji II nagradu osvojila je Aida Halilčević. Na takmičenju su izvedena djela: M. Moskovskog, M. Mussorgskog, M. Petrovića, G. Kerzschera i L. Knorra. Takmičarske ekipe pripremile su nastavnice Alma Kurtić, Mirzeta Sakan i Dženana Subašić (izvor: OŠ „Hasan Kikić“ Gračanica).

29. 11. 2017.
Održana 13. sjednica Općinskog vijeća Gračanica: izvještaj o realizaciji Budžeta za devet mjeseci 2017.

Kako je obrazložio načelnik općine Nusret Helić, „ukupni prihodi i primici ostvareni su u iznosu od 9.113.838 KM ili 80,83 % u odnosu na ukupan plan. Budžet se za 9 mjeseci ostvarivao u planiranim veličinama, što bi trebalo biti nastavljeno i u narednom periodu. Za devet mjeseci ostvareni suficit od 2.139.675 KM. Koji je djelimično rezultat nešto ukupno većih ostvarenih prihoda i nekih manjih ušteda, ali je većinom

rezultat nerealizovanih kapitalnih projekata zbog provođenja složenih procedura.“ Osim ovog izvještaja, usvojen je programa kapitalnih investicija Općine Gračanica za period 2016.-2020.godine, te još nekoliko odluka i informacija.

8. 12. 2017.
Direktor JP „Vodovod i kanalizacija“ Gračanica, dr. sc. Fuad Alić, dobitnik uglednog priznanja „Najmenadžer i najkompanija decenije“..

...koje mu je uručeno na, već tradicionalnoj, 37. Ceremoniji proglašenja najboljih od najboljih poslovnih ljudi i kompanija iz Bosne i Hercegovine u banjalučkom Banskom dvoru, uz prisustvo nekoliko stotina najuspješnijih menadžera i većeg broja privrednih, političkih i javnih ličnosti Banje Luke i Bosne i Hercegovine, Stručni žiri nezavisne Agencije za izbor i promociju najuspješnijih poslovnih ljudi i kompanija dodijelio je 21 nagrada najuspješnijim menadžerima iz cijele Bosne i Hercegovine. Osim proglašenja najboljih, banjalučka manifestacija u čast biznisa protekla je i ovoga puta u znaku razgovora i dogovora biznismena i predstavnika vlasti sa najviših nivoa o mogućim pravcima daljeg razvoja, unapređenju ekonomije, bržem i većem regionalnom povezivanju, ekonomskim

dometima i budućim šansama Bosne i Hercegovine (Izvor: Akta.ba)

11. 12. 2017.

Promovisan 44. broj Časopisa za kulturnu historiju "Gračanički glasnik"

Dvadesetak novih radova, priloga i članaka, koji su razvrstani u već ustaljene rubrike "Povodom", "Teme", "Prošlost", "Građa", "Zavičaj" i "Riječ", uz "Listove gračaničkog kalendara" kao svojevrsnu hroniku lokalne zajednice, koju ovaj časopis ispisuje od svojih početaka, 1996. godine – publici je predstavio član Redakcije mr. Edin Šaković. Tema promocije bile su kratke priče Mirsada Čamdžića, dugogodišnjeg radijskog novinara Radio Gračanice i autora dokumentarnih TV-reportaža, koji se na stranicama "Gračaničkog glasnika" po prvi put predstavio svojim proznim stvaralaštvom. O umjetničkim dometima te proze govorila je mr. sc. Fatima Bećarević, članica redakcije, uz čitanje odabranih priča i izvoda iz recenzija, a potom se prisutnima obratio i sam autor. Njegova proza je primjer konkretizacije principa izmirenja dokumentarističkog i estetskog, odnosno prerastanja faktografskog u umjetničko – istaknuto je na promociji "Gračaničkog glasnika".

19. 12. 2017.

Svečano otvorena nova sezona klizanja u Gračanici

Klizalište je, na radost mnogih dječaka i djevojčica, općenito mladih, po treći puta otvoreno na Rukometnom stadionu u Gračanici. Brojnim građanima, posebno mladim, okupljenim tim povodom, načelnik općine Nusret Helić obećao je bogatu „zimsku ponudu“ zabave i razonode, počevši od novogodišnjeg bazara, zabavnih programa za najmladje, proslava Nove godine na otvorenom i dr.

Svečanost ceremonije otvaranja je uveličala svojom pjesmom Sarah Fazlić.

22. 12. 2017.

Otvoren novogodišnji – Zimski bazar u centru Gračanice

Riječ je o manifestaciji izložbeno-prodajnog karaktera, koju uspješno organizuje Općina Gračanica u saradnji sa BKC-om, nevladinim organizacijama, osnovnim i srednjim školama. Na bazaru, koji se inače, organizuje u centru grada, sa svojim proizvodima i rukotvorinama nastupile su sljedeće organizacije i udruženja: „Bosna art“ Stjepan Polje, „Gračaničko keranje“, Udruženje žena Privaba, Udruženje žena „Behar“ Škahovica, KUD-a „Adem Alić“, Mreža „Žena u biznisu“ – klub Gračanica, „Izvor“ Škahovica, „Plodovi zemlje“ Lukavica, Resursni centar za dijete i omladinu, udruženje „Futura“, Udruženje žena „Gradina“ Soko, te učenici gimnazije „Dr. Mustafa Kamarić“, MSŠ Gračanica, o.š. „Hasan Kikić“, Druge osnovne škole, te zanatlije Alije Derviševića i drugih. Manifestacija je praćena prigodnim muzičkim i zabavnim sadržajima, horskim, plesnim i folklornim nastupima, te revijom večernjih frizura i dr. U okviru Bazara organizovana je već tradicionalna četenijada, na kojoj je nastupilo šest ženskih udruženja. Najbolju četeniju napravile su žene iz Stjepan Polja, drugo mjesto su zauzele žene iz UG „Izvor“ Škahovica, dok je treće mjesto pripalo ženama iz Udruženja žena „Gradina“ iz Sokola. (Gračanički. Ba)

24. 12. 2017.

Dodijeljena priznanja za najuspješnije sportiste općine Gračanica u 2017. godini

Na tradicionalnoj svečanosti, u prepunoj velikoj sali BKC-a za najbolje sportiste pojedince proglašeni su Emina Jukan, članica Ženskog odbojkaškog kluba Gračanica „Fortex“ i Ad-

mir Ahmetašević, član Rukometnog kluba Gračanica i reprezentativac BiH. Emina je zlatni student na Pravnom fakultetu Univerziteta u Tuzli, a Admir odnedavno profesor tjelesnog odgoja i rukometni reprezentativac BiH. To je dokaz da su ova priznanja otišla u prave ruke.

Ostala priznanja: *najuspješniji ženski kolektiv* je kata tim Karate kluba Gračanica, a u *muškoj konkurenciji* nagrada je otišla u Nogometni klub „Bratstvo“; Sakib Mehanović (KK „Gračanica“) je proglašen za *najperspektivnijeg mladog trenera*, dok je nagrada za *najboljeg sportskog radnika* pripala Muji Hasiću, dugogodišnjem predsjedniku NK „Mladost“ Malešići. Zahvalnicu za razvoj šaha na području naše općine dobila je Nihada Okanović, predsjednica ŠK „Gračanica“, dok je Nedim Musić je dobio *posebno priznanje za razvoj rukometa* na području Gračanice.

Najbolji junior je Omer Mehmedović (RK Gračanica), a *junior*ka Adela Husamović. (JK „Pribava“). *Najbolji kadeti* su Azer Musić (RK „Gračanica“) i Adela Kunić (JK „Pribava“). U *pionirskoj konkurenciji* nagrade su dobili Mubina Rešidbegović (KK „Gračanica“) i Amer Islamović (NK „Bratstvo“). *Najuspješnija osnovna škola* je Donja Orahovica, a nastavnik Nermin Hodžić (Donja Orahovica). Za *najuspješnijeg profesora tjelesnog odgoja* proglašen je Almir Devedžić (MŠŠ).

26. 12. 2017.

Dženo, dženo Romanipe (Bit će, romski narod) – još jedna premijerna predstava rediteljke Mirele Trepanić

0 ...koja je sa svojim glumcima, amaterima iz Gračanice uspjela postaviti interesantan muzičko-scenski performans o romskoj kulturi i tradiciji. Iako sama tematika nije pogodna za scensko postavljanje i scenski izraz, redateljka je zajedno sa svojom razigranom ekipom uspjela ukazati, makar u fragmentima na sve specifičnosti kulture i mentaliteta romskog naroda, uključujući i tragične re-

miniscencije na njegovu sudbinu u prošlosti. Pjesmom, igrom, pa i glumačkim umijećem „Mirelina ekipa“ je uspjela dovoljno jasno izraziti optimističku poruku iz naslova predstave: „Bit će romski narod“. U velikoj sali BKC Gračanica, po završetku predstave, dugotrajnim aplauzom publika je nagradila i glumce i njihovu redateljku. „Bit će romski narod“, bit će još uspješnih premijera Mirele Trepanić, nadamo se.

27. 12. 2017.

„Lideri biznisa TK 2017.“ – četiri kompanije iz Gračanice

Manifestaciju pod tim nazivom po treći puta zaredom organizuju Novine „Glas TK“, čiji je Stručni žiri u konkurenciji od oko 50 kompanija predstavljenih u okviru projekta „Svijetla strana privrede“, odabrao lidere, koji su radom i asortimanom proizvoda u protekloj godini plijenili pažnju tržišta i dali poseban doprinos privrednom razvoju Kantona. Projekat „Svijetla strana privrede“ realizovan je u saradnji sa Vladom TK kao podrška kampanji „Kupujmo domaće“. Lideri biznisa TK za 2017 godinu u oblasti proizvodnje, građevinarstva, energetike i rudarstva su: UNIS TOK Kalesija, „Aksemont“ Srebrenik, „Solid Wood“ Gradačac, „Geoservis“ Živinice; iz Gračanice „Radial“ „Kovan MI“ i „Tring“, a iz Tuzle „Babilon“, „Umel Dalekovodmontaža“ i „Tehnograd Company“. „Lideri biznisa TK 2017“ iz oblasti uslužnih djelatnosti su: „Belamionix“ Brčko, „Transturist“ Tuzla i Centralno grijanje Tuzla. Lider iz oblasti prehrambene industrije je „Gamus“ Lipnica, a iz oblasti obrtne djelatnosti „Mekić“ Gračanica. (glastk.ba)

28. 12. 2017.

U 2017. godini u Gračanici izgrađeno 15 fabrika

By dizajnplusVijesti, Lokalne vijesti, Vijesti, GračanicaPrema podacima, koje su prenijeli

neki portali, ove godine u Gračanici je izgrađeno ili prošireno 15 fabrika. Kompanija „Plamingo“ je pustila u rad modernu fabriku za galvanizaciju – kromiranje dijelova za autoindustriju i sanitariju, vrijednu oko osam miliona eura. Novu fabriku za preradu žice i novi skladišni prostor sagradila je i kompanija „Trgovir“ u Poslovnoj zoni Stjepan Polje. U gračaničkom „Indexu“ dovršavaju dvije hale za smještaj CNC mašina, u vrijednosti većoj od 20 miliona KM. U firmi „Eurogalant“, koja se bavi preradom kože i proizvodnjom kožne galanterije, završen je nadograđeni dio proizvodnog pogona. U toku je gradnja dvije proizvodne hale kompanije „Poly“. Gradnja novih hala nije jedini uspjeh gračaničkih firmi. Firma „Tring“ proizvela je ove godine prvi bh. računar, a firma „Fining“ proizvela petstotu dizalicu, najveći mosni kran u zemlji. (Biznis.Info)

28. 12. 2018.

Održana 14. sjednica općinskog vijeća Gračanica: usvojen Budžet od 13.357.935 KM i ključni programski dokumenti za 2018.

„Osim što smo povećali sredstva za kapitalne projekte bitno je napomenuti da smo planirali i sredstva za poticaje biznisa, poljoprivredne poticaje, veća sredstva za kulturu, nevladine projekte, grantove MZ, porodiljama, potporu poduzetništvu žena i srednjoškolaca i drugo. Ovaj prijedlog budžeta je rezultat široke rasprave i uključenja većeg broja građana, te je potvrdio da se uvažavaju mišljenja građana i da je budžet sve više građanski.“, rekao je u svom obrazloženju Budžeta za 2018. godinu općinski načelnik. Potom je usvojen program rada Općinskog vijeća i Općinskog načelnika za 2018. Osim ovih, od ostalih tačaka dnevnog reda, vrijedi spomenuti i Odluku o pristupanju izradi Urbanističkog plana Gračanica i Prijedlog programa razvoja zaštite i spašavanja ljudi i materijalnih dobara od prirodnih i drugih nesreća općine Gračanica 2018. -2022.

28. 12. 2017.

Kantonalni sud Tuzla potvrdio je optužnicu Kantonalnog tužilaštva Tuzlanskog kantona protiv šest odgovornih osoba u fabrici obuće „Fortuna“ Gračanica.

U deset tačaka optužnice se navodi da su članovi ove grupe, u periodu dužem od 8 godina, od 2009. do 2017. godine, zajedničkim i planskim djelovanjem osnivali paralelna i vezana privredna društva kako bi koristili sve potencijale i poslovne veze dioničkog društva „Fortuna“. Oni su činjenjem većeg broja krivičnih djela pribavili imovinsku korist za sebe ili osnovane firme, a pri čemu je pričinjena imovinska šteta za gračaničku „Fortunu“ u iznosu od oko 4,5 miliona KM, te stvorene obaveze radi neplaćenih direktnih poreza i doprinosa za radnike „Fortune“ u iznosu od oko 5,5 miliona KM. Optužnicom se Safet Pjanić (60), generalni direktor „Fortune“ i jedan od osnivača firme „Fortex“ tereti da je organizirao i rukovodio grupom koja se bavila organiziranim kriminalom u oblasti privrednog kriminala i korupcije. Uz Safeta Pjanića, kao vođe grupe za organizirani kriminal, optuženi su i Husein Nurikić (62) - finansijski direktor i član uprave „Fortune“, Ibrahim Muharemović (64)-direktor firme „Fortob“ i član uprave „Fortune“, Bakir Pjanić (33)- direktor firme „Fortunnatto“, Redžo Delimehić (57)-direktor firme „Fortex“ i Alija Nurikić (rođena 1960. godine)-knjigovođa Fortune. U šestoj i jedanaestoj tački optužnice se i stečajnom upravniku u „Fortuni“ Muhamedu Hadžiću na teret stavlja da je počinio krivična djela zloupotreba položaja i ovlaštenja i kritvotvorenje službene isprave, ali ne kao član pomenute grupe. (Izvor: Odjel za odnose sa javnošću Kantonalnog tužilaštva)

27. 01. 2018.
Medalja “Pravednik među narodima”
dr. Avdi Prohiću i njegovoj porodici

Ovo ugledno priznanje, koje Memorijalni centar “Yad Vashem” i vlada Izraela dodjeljuju osobama koje su spašavale Jevreje tokom Holokausta, rizikujući vlastiti život – posthumno je dodijeljeno dr. Avdi Prohiću iz Gračanice, kao nosiocu medalje, njegovoj majci Esmi, te bratu Sabriji i Sabrijinoj ženi Safeti. “Ko spasi jednog čovjeka, kao da je spasio čitav svijet” – ugravirano je na medalji. Ceremonija svečane dodjele priznanja, koje će u ime porodice i nasljednika primiti Rejhan Prohić iz Gračanice, saradnik našeg časopisa, planirana je za konac maja ove godine u Sarajevu. Ime dr. Avde Prohića biće ugravirano na Zidu časti, u parku centra Yad Vashem. Dr. Avdo Prohić je prvi Gračanlija, nosilac ovoga visokog priznanja (ne računajući dr. Stanka Sielskog, Gračanliju po rođenju).

30. 1. 2018.
Održana 15. sjednica Općinskog vijeća
Gračanica: pošto je povučena sa
dnevnog reda Odluka o dimnjačarskoj
djelatnosti, ostale tačke tiču se samo
općinske administracije

To su tri odluke (o dopuni Programa rada Općinskog vijeća za 2018. godinu; o finansiranju Klubova vijećnika u Općinskom vijeću; o saradnji vijećnika sa mjesnim zajednicama) i četiri izvještaja (o realizaciji Programa rada Općinskog vijeća za 2017. godinu; o rješavanju upravnih stvari u upravnom postupku u službama za upravu općine Gračanica u 2017. godini; o izvršenim procjenama prometa nepokretnosti i prava za 2017. godinu; o izvršenim mjerenjima zadovoljstva građana javnim uslugama i radu Općinskog vijeća). Tu je i Inicijativa koordinacije boračkih udruženja Općine Gračanica za izmjenu Odluke o utvrđivanju značajnih datuma na nivou općine

Gračanica koja je usvojena i provodit će se „naspram raspoloživih para“.

28. 2. 2018.
Održana 16. sjednica Općinskog
vijeća Gračanica: podrška Općinskom
načelniku...

...iskazana je sa 24 glasa „za“ i 4 „suzdržana“ usvajanjem dokumenta pod naslovom „Izvještaj o realizaciji programa rada, ostvarivanju politike Općine i aktivnostima Općinskog načelnika za 2017. godinu“. Osim ove, od značaja je i donesena Odluka o rezervisanim površinama za Sajmište i tehnološko-inkubacioni centar, koji se predviđa u krugu „Feringa“. Međutim, najviše pažnje privukla je Odluka o finansiranju klubova vijećnika u Općinskom vijeću Gračanica, koja je na prethodnoj sjednici bila povučena uz zaključak da klubovi vijećnika i političke partije do 15. februara dostave svoje prijedloge i primjedbe Stručnoj službi vijeća. Kako niko nije dostavio prijedloge i primjedbe, Odluka se u istoj formi našla na dnevnom redu i ove sjednice, pa je, uz nekoliko amandmana Općinskog načelnika i usvojena, čime se, po mišljenju predlagača, unosi više reda u raspodjeli sredstava predviđenih u te svrhe. Pored ove, usvojena je i odlukao izmjenama i dopunama Odluke o općinskim priznanjima, potom dat u javnu raspravu Nacrt *Pravilnika o uslovima za obavljanje poslova upravitelja zgrada kolektivnog stanovanja s uputstvom o načinu promjene upravitelja*. Od ostalih tačaka dnevnog reda ove sjednice, vrijedi spomenuti naslove još nekoliko informacija koje su usvojene takoreći bez ikakve rasprave: o dodjeli stipendija učenicima srednjih škola i studentima za školsku 2017./2018. godinu, o stanju isporuke toplotne energije iz gradske toplane, o stanju zaštite od požara i o stanju bezbjednosti na području općine Gračanica.

28. 2. 2018.

Svečano obilježen Dan nezavisnosti BiH: izložba slika likovne grupe „M4“

Obilježavanje je počelo svečanom ceremonijom polaganja cvijeća na Centralnom spomen obilježju Odbrambeno-oslobodilačkog rata 1992.–1995. te Partizanskom spomeniku i spomen bisti J. B. Tita u centralnom gradskom parku. Potom je održana svečana akademija sa kulturno-umjetničkim programom. Prigodan referat pročitao je Nihad Krajinović, predsjedavajući Općinskog vijeća Gračanica. Ovim povodom otvorena je i izložba slika simboličnog naziva „M4“ troje autora: Enesa Kavgića iz Tuzle, Nisada Hamzića iz Dobošnice i Gordane Mehmedović iz Gračanice. Obilježavanju Dana nezavisnosti pridružili su se i učenici Mješovite srednje škole Gračanica i Gimnazije „Dr. Mustafa Kamarić“ koji su u velikoj sali Bosanskog kulturnog centra priredili prigodan i zanimljiv program.

2. 03. 2017.

U organizaciji Javne biblioteke Lukavac: Treća po redu „Staza života književnika Atifa Kujundžića“



Nakon što su prijatelji Atifa Kujundžića položili cvijeće na njegov grob, u izložbenom prostoru JU Javna biblioteka Lukavac otvorena je izložba slika autorice Vesne Aščerić-Kujundžić. O slikama je nadahnuto i kritički govorio Nijaz Alispahić, književ-

nik iz Tuzle, a o liku i djelu Atifa Kujundžića ugledni lukavački intelektualac prof. dr. Edhem Muftić. U okviru manifestacije promovisane su i dvije zanimljive knjige, čije su autorice Džehva Havić i Refika Dedić iz Bihaća, a nastupili su i učenici osnovne škole Lukavac Grad koje je odlično pripremila profesoricica Ismeta Džibrić.

„Imao sam sreću da poznajem i donekle upoznam Atifa Kujundžića“, rekao je na manifestaciji Mihad Sakić, bibliotekar i ugledni publicista, organizator mnogih kulturnih manifestacija u Lukavcu. „Danas se mogu prepričavati mnogi događaji koji su vezani za ličnost i životni put ovog nesvakidašnjeg i neponovljivog kreatora mnogih književnih, novinarskih, pa da dalje puno ne nabrajam u lijepljenju atributa i etiketa, ali slobodno konstatujem, mudraca i filozofa koji je hodio strmim i kliskim stazama naše kulture. (...) Uvijek se borio za racionalne i logičke stvari i nikako nije trpio improvizaciju ili pak, lažno prikazivanje nekih stvari, pojava i događanja. Manirom vrhunskog intelektualca govorio je i pisao, te se otvoreno suprotstavljao konformizmu, učmalosti i poltronsko-režimskom djelovanju nekih poznatih, ali klimavih ličnosti javnog života u BiH...“

Ovom Manifestacijom obilježena je treća godišnjica smrti književnika Atifa Kujundžića, koji je svoj životni vijek proveo u Lukavcu, nikada ne gubeći vezu sa Gračanicom, kao gradom svog djetinjstva i rane mladosti. Oba grada podjednako je volio i podjednako svojim djelom zadužio. Zato je za očekivati da se, pored Lukavca i Gračanica pridruži ovoj manifestaciji ili da se na neki drugi način prisjeti svog pjesnika.

03. 03. 2018.

Otvoren spomen-park na brdu Oblič

U povodu 24. godišnjice oslobođenja Oblića, svečano je otvoren novouređeni spomen-park, u znak sjećanja na 24 borca koji su položili živote za Bosnu i Hercegovinu

na padinama ovog istaknutog uzvišenja, sa kojeg je skoro pune dvije godine sijana smrt po Lukavici Rijeci i Lukavici. Na svečanosti se okupio veći broj građana ovih naselja, te veterana ratnih jedinica koje su učestvovala u akciji oslobađanja Oblića, čijom inicijativom je park i sagrađen. "Ovo su mjesta na kojima su kameni temeljci slobode i budućnosti, i Doboj-Istoka i Bosne i Hercegovine", poručio je načelnik općine Doboj-Istok Kemal Bratić, dodavši da se ne smije dozvoliti zaborav, jer oni koji ne pamte i ne poznaju vlastitu prošlost nemaju ni budućnost. Jedan od ratnih komandanata 109. brdske brigade, Mirsad Sinanović, zahvalio se svima što čuvaju uspomenu na sve ono što se dešavalo, a Ibrahim Jahić, nosilac ratnog priznanja "Zlatni ljiljan", u ime inicijatora je istaknuo da institucije države treba da realiziraju ovakve projekte, a ne ratni veterani. Na svečanosti su uručene i zahvalnice svima koji su pomogli u izgradnji i uređenju parka.

16. 03. 2018.

Nova klizišta na području općine

Nestabilno vrijeme i obilnije padavine donijele su nove probleme mještanima naselja na općini Gračanica, u kojima se javljaju nova i reaktiviraju stara klizišta. Najviše problema je izazvalo klizište u mjesnoj zajednici Gornja Orahovica, u naselju Mehinbašići, gdje je prekinulo promet na regionalnoj cesti Donja Orahovica-Falešići-Srebrenik, te ugrozilo tri stambena objekta. Na lice mjesta su izašli predstavnici Civilne zaštite i geološke struke, koji su izvršili stručni uvid. Cesta je ubrzo nasuta, poravnata i stabilizirana, tako da je nesmetan promet ponovo uspostavljen, ali mještani i dalje strahuju od ugrožavanja kuća i pomoćnih objekata.

20. 03. 2018.

Po prvi put obilježen 20. mart–Dan šehida i poginulih boraca općine Gračanica.

Ceremonija obilježavanja ovog datuma, na inicijativu Organizacije porodica šehida i poginulih boraca općine Gračanica, započela je okupljanjem, polaganjem cvijeća i odavanjem počasti na Centralnom spomen obilježju Odbrambeno-oslobodilačkog rata 1992.–1995. u Gračanici, gdje se prisutnima obratio glavni imam Medžlisa Islamske zajednice Gračanica, Smajo ef. Mustafić. Program je nastavljen svečanom akademijom u sali Muzičke škole, gdje su se govorili predstavnici gračaničke Organizacije porodica šehida i poginulih boraca, Općine Gračanica i boračkih udruženja, kao i Saveza organizacija porodica šehida i poginulih boraca Tuzlanskog kantona. Inače, obilježavanje ovakvog datuma uvedeno je po uzoru na druge općinske organizacije na području Kantona, a 20. mart je odabran u znak sjećanja na isti datum 1995. godine, kada su u tuzlanskoj kasarni, u vrijeme potpisanog primirja, od iznenadne agresorske granate poginula dvadesetorica boraca 212. bosanske oslobodilačke brigade, skoro svi s područja općine Gračanica.

23. 03. 2018

190.000 KM za unaprjeđenje proizvodnje suhe šljive

...osigurano je kroz ulaganja Europske unije, uz skromnije učešće općine Gračanica (od 35.000 KM). Sredstva će biti realizirana u okviru projekta „Inovacije u lancu vrijednosti suhe šljive“, koji ima za cilj uspostavu novih i sanaciju postojećih voćnjaka, radi poboljšanja sirovinske osnove za proizvodnju suhe šljive, kao i povećanja kapaciteta proizvođača svježe šljive. Projekt implementira Nezavisni biro za razvoj, sa partnerima: Općinom Gračanica, Zemljoradničkom zajednicom „Gračanka“ i Tehnološkim fakulte-

tom Univerziteta Tuzla, a sredstva je osigurala Europska unija, u okviru Programa za lokalnu samoupravu i ekonomski razvoj u BiH (EU ProLocal), kojeg implementira njemačka organizacija GIZ.

29. 03. 2018.

Održana 17. sjednica Općinskog vijeća: o izvršenju Budžeta u 2017. godini...

... tokom sjednice mogle su se čuti samo pohvale kako od načelnika, kao predlagача, tako i od većine diskutanata. Iz mnoštva cifara u ponuđenim materijalima, ističe se da je plan budžeta bio 13.091.180 KM i da je od toga potrošeno 12.670.973 KM. Uz napomenu da se razlika pojavljuje na projektima, čija se realizacija prenosi u 2018. godinu, opća ocjena (usvojena većinom glasova) je da je prošlogodišnji Budžet bio realno planiran i da je planski trošen. Od važnijih tačaka, vijećnici su „odradili“ Nacrt Odluke o izmjenama i dopunama Poslovnika o radu Općinskog vijeća, kojom će se, kako je rečeno, unaprijediti rad i efikasnost Vijeća. Pažnju vijećnika privukle su i 4 odluke vezane za promet građevinskog zemljišta, koje se u pravilu donose početkom svake godine, kao i plan upisa učenika u gračaničke srednje škole – Gimnaziju i Mješovitu srednju školu. Novina je da se u Gimnaziju uvodi kao novi – smjer informacionih tehnologija, dok su sve ostalo standardne i uvijek šuplje priče o potrebi usklađivanja upisa sa potrebama privrede. Rutinski su i sa najvišim ocjenama usvojeni izvještaji o radu tri općinske javne ustanove: Centra za socijalni rad, Dječjeg obdaništa i Bosanskog kulturnog centra.

07. 04. 2018.

Gračanički 7. april: “Stopama dr. Mustafe Kamarića” i koncert Amire Medunjanin


Uz običajena polaganja cvijeća i svečanu akademiju, novina u ovogodišnjem obilježava-



nju ovog općinskog značajnog datuma, Dana oslobođenja Gračanice u Drugom svjetskom ratu, bio je prigodan program učenika Gimnazije “Dr. Mustafa Kamarić”, nazvan “Stopama dr. Mustafe Kamarića”, u povodu 92. godišnjice rođenja ovog znamenitog Gračanlije, čije ime nose i gimnazija, i gradska biblioteka. Uz podsjećanje na život i djelo dr. Mustafe Kamarića, gračanički gimnazijalci su se predstavili i vlastitim stvaralaštvom. Uvečer, u Bosanskom kulturnom centru je, u prepunoj velikoj sali, održan koncert Amire Medunjanin, jedne od najpoznatijih i najpriznatijih interpretatorki sevdaha u našoj zemlji, kao i širom svijeta.

16. 4. 2018.

Uspješno završeno projektovanje i izvođenje ugovorenih radova na novom proizvodnom pogonu firme „Variplast“ Gračanica.



Izvođenje radova povjereno je gračaničkoj građevinskoj kompaniji „Širbegović“, iz koje su, nakon uspješno završenog posla poručili:

„Veliko nam je zadovoljstvo zbog nastavaka veoma uspješne saradnje sa firmom *Variplast*.“ Inače, ova firma se bavi metodama ekstrudiranja LDPE i HDPE folije, štampanje tipa flexografije do 400 lpi, konfekcioniranje i recikliranje tehnološkog otpada. Njeni proizvodi se koriste u prehrambenoj, tekstilnoj i hemijskoj industriji, građevinarstvu, poljoprivredi kao i objektima široke potrošnje – supermarket, butici, prodavnice. (Izvor: info portal „Širbegović“ obuča ...).

25. 04. 2018.

Otvořen 9. međunarodni sajam obrta i poduzetništva “Grapos-Expo 2018”

...ovoga puta na novoj lokaciji, u prostoru gračaničkog “Feringa”, koji će, prema planovima organizatora, postati i stalna lokacija održavanja sajma tokom narednih godina. Na 121 štandu svoje proizvode i usluge su prezentirala 322 izlagača iz šest zemalja. Prvog dana, posjeta je bila već rekordna, a organizatori su izjavili da tokom održavanja sajma očekuju posjetu od ukupno 25.000 osoba. Na otvorenju sajma su se obratili predstavnici organizatora i partnera, a ove godine su to bili Vlada Tuzlanskog kantona i Hrvatska obrtnička komora. Ovakvi događaji su najbolji promotori i ambasadori privrede kako Tuzlanskog kantona, tako i Bosne i Hercegovine, istaknuo je kantonalni premijer Jakub Suljkanović. Izrazivši želju da će ovaj sajam postati najbolji u Federaciji, predsjednik Hrvatske obrtničke komore Dragutin Ranogajec ga je ocijenio kao svojevrsan poziv u svijet. Dokazuje to i dinamika privlačenja izlagača, a izlagači ne dolaze tamo gdje nema koristi, naglasio je u svom obraćanju. Načelnik općine, Nusret Helić, istaknuo je, pak, da je samo kroz udruživanje snaga, volje i pameti moguće stvarati povoljniju klimu za razvoj društva. Direktor Sajma, Nedžad Nuhanić, je u svom obraćanju izrazio zadovoljstvo odzivom izlagača i posjetilaca, najavivši da je namjera organizatora da naredni,

jubilarni sajam preuzme lidersku poziciju u Bosni i Hercegovini. Svečanosti otvorenja Sajma prisustvovali su i brojni predstavnici predstavničke i izvršne vlasti na različitim nivoima, predstavnici diplomatskog kora, te obrtničkih i privrednih komora.

27. 04. 2018.

Još jedan ekološki incident na Spreči: ovoga puta došlo je do pucanja nasipa na taložištu “Bijelo more” kod Lukavca

...dio taloga – hemijskog otpada koji nastaje preradom sode i koji se na površinu, prozvanu “Bijelo more” odlaže još od samih početaka Fabrike sode Lukavac, izlio se u rijeku Spreču i na susjedno zemljište. Iako nije visoko-toksičan, talog je, krećući se nizvodno, izazvao dosta straha među sportskim ribolovcima i vlasnicima zemljišta duž obala Spreče. Izdato je upozorenje da se voda iz Spreče privremeno ne koristi za navodnjavanje, a primijećeni su i slučajevi uginuća ribe. Ubrzo su započeli i poslovi na sanaciji nasipa... Uplašeno i zabrinuto stanovništvo koje živi pored Spreče uzalud se pita: Dokle više...?

27. 4. 2018.

Održana 18. sjednica Općinskog vijeća Gračanica: odluka o pristupanju izmjenama i dopunama Statuta općine Gračanica...

...donesena je s ciljem da se, kako su kazali predlagači, otklone neke nepreciznosti u postojećem statutu i da se rad općinskog vijeća učini efikasnijim. Glavna tačka bila je ipak „budžetska“. Izraženo je zadovoljstvo većine što se Budžet za prva tri mjeseca 2018. ostvaruje u okvirima plana: od planiranih 13.397.935 KM, u navedenom periodu realizovano je 2.692.947 KM. Ostale tačke se u istoj formi prezentiraju svake godine Vijeću, pa su i ovoga puta razmatrane i usvojene rutinski.

Tako su (uz pohvale) usvojeni izvještaji o radu javnih zdravstvenih ustanova u prethodnoj godini iz nadležnosti općine- Doma zdravlja, Gradske apoteke i Veterinarske stanice, donesena odluka (u nacrtu) o općinskim priznanjima i o osnivanju Zdravstvenog savjeta, te nekoliko odluka o raznim imenovanjima u okviru radnih tijela Općinskog vijeća.

09. 05. 2018.

Odlazak pjesnika Muhameda Dautovića

U 51. godini života preminuo je Muhamed Dautović, pjesnik iz Sokola, vrijedni suradnik i poštovalac ovog časopisa. Pisao je još od svojih osnovnoškolskih dana. Već kao srednjoškolac, bio je aktivan u Književnom klubu "Vidici", objavljujući stihove na stanicama zbornika koje je ovaj klub izdavao. Po završetku srednje škole, odlazi za poslom u Zagreb, gdje djeluje u Književnom klubu "Otokar Keršovani". Nastupao je na više manifestacija i pjesničkih susreta, uključujući i "Zagrebačka jutra poezije". Posljednjih godina, bio je aktivan u Bošnjačkoj zajednici kulture "Preporod". Stihove je objavio u Zborniku "Šapat provincije", časopisima "Amanet" i "Avlija", te u "Gračaničkom glasniku", u tri broja.

11. maj, 2018.

Umro Nesib Suman, ugledni gračanički društveni i prosvjetni radnik i privrednik

Potiče iz poznate gračaničke familije Sumana, rođen je 1934. godine, pripadao je generaciji

prvih gračaničkih učitelja i prosvjetitelja. Prvo zaposlenje dobio je nakon otvaranja četvorogodišnje osnovne škole u Babićima, 1951. godine, gdje se, osim „učiteljevanja“ i prosvjeđivanja naroda angažovao u mjesnom narodnom odboru, pomažući u rješavanju mnogih tadašnjih problema sela. Od osnivanja Narodnog univerziteta, 1959., pa sve do 1975. bio je direktor te ugledne javne ustanove za obrazovanje i kulturu, koja je u svom sastavu objedinjavala Narodnu biblioteku, gradski bioskop, Radio-stanicu (od njenog osnivanja 1969.), te centar za obrazovanje i kulturu, u kojem je radila Osnovna škola za obrazovanje odraslih, centar za stručno obrazovanje radnika, centar za selo i poljoprivredu, kinofikaciju sela, opće prosvjeđivanje odraslih na selu, a od 1975. i muzičku školu. Kao čovjek vrlo širokih interesovanja, sa velikim iskustvom u prosvjeti, 1975. godine raspoređen je na dužnost sekretara Samoupravne interesne zajednice osnovnog obrazovanja (fonda) u Gračanici, a nakon nekoliko godina ogledao se i u privredi kao direktor gračaničke štamparije i Modne konfekcije „Olimp“. Za njegovog mandata izgrađeni su novi moderni pogoni te firme u industrijskoj zoni Gračanice, sredstvima udruženog mjesnog samodoprinosu za zapošljavanje. Bio je aktivan u i političkom životu općine (jedno vrijeme potpredsjednik općine i predsjednik Općinskog komiteta Saveza komunista). Penzionisan je koju godinu pred rat i agresiju na BiH 1992. godine. Ratne i poratne godine proveo je, dosta povučeno, kao penzioner u svom rodnom gradu.